

III. OUTRAS DISPOSICIÓNS**CONSELLERÍA DE CULTURA, LINGUA E XUVENTUDE**

ORDE do 15 de maio de 2026 pola que se aproban as bases e se anuncia a convocatoria pública de bolsas de formación nos lectorados de lingua, literatura e cultura galegas para o 2026 (código de procedemento PL500E).

A Xunta de Galicia, de acordo co previsto na Lei 3/1983, do 15 de xuño, de normalización lingüística, desenvolve accións para a difusión da lingua propia de Galicia fóra do seu ámbito territorial. O Decreto 146/2024, do 20 de maio, polo que se establece a estrutura orgánica da Consellería de Cultura, Lingua e Xuventude, atribúelle a esta as competencias e funcións en materia de promoción e ensino da lingua galega, así como a dirección, planificación, coordinación e execución da política lingüística da Xunta de Galicia. Dentro da estrutura da consellería, consonte o disposto no devandito decreto, é a Secretaría Xeral da Lingua o órgano encargado de executar aquelas accións necesarias para desenvolver as competencias sobre política lingüística atribuídas á consellería.

Así mesmo, o 21 de setembro de 2004 aprobouse no Parlamento de Galicia, por unanimidade de todos os grupos parlamentarios, o Plan xeral de normalización da lingua galega, desenvolvido no seu momento por instancia da antiga Consellería de Educación e Ordenación Universitaria. Neste plan recoméndanse unha serie de medidas de actuación segundo o sector social implicado. No que se refire á proxección exterior do galego, un dos obxectivos marcados no plan é o de «consolidar o ensino e a investigación do galego nas universidades en que xa existe como materia de estudo e introduci-lo noutras universidades de interese estratéxico».

No sentido apuntado, e a través de convenios de colaboración subscritos con universidades de fóra de Galicia interesadas en incluír nos seus plans de estudo o ensino de lingua, literatura e cultura galegas, créanse os centros de estudos galegos, como órganos de referencia nestas universidades, a través dos que se canalizan as actividades promotoras da nosa lingua, non só neste ámbito académico senón tamén na súa área de influencia.

Son precisamente estes centros o instrumento idóneo para promover unha formación eminentemente práctica entre os/as titulados/as universitarios/as que cumpran os requisitos de participación exixidos nesta convocatoria. A Secretaría Xeral da Lingua, dentro dos seus programas de formación relacionados coa lingua, a literatura e a cultura galegas, dirixidos a unha ampla gama de destinatarios, ofrécelle a este colectivo a posibilidade de



se incorporar aos centros de estudos galegos, co fin de completar a súa formación e de se situar nunha mellor posición de cara a unha futura inserción no mundo laboral. O programa de formación complétase con actividades teórico-prácticas deseñadas desde a Secretaría Xeral da Lingua en exclusiva para o colectivo de lectores/as de lingua, literatura e cultura galegas e, con base nos convenios subscritos, facilítase a posibilidade de realizar ou de completar estudos de posgrao nas universidades de destino.

En aplicación do previsto no artigo 14.3 da Lei 39/2015, do 1 de outubro, do procedemento administrativo común das administracións públicas (BOE núm. 236, do 2 de outubro), e do artigo 10.2 da Lei 4/2019, de administración dixital de Galicia (DOG núm. 141, do 26 de xullo), as persoas que poden participar nesta convocatoria contan coa capacidade técnica para acceder e dispoñer dos medios electrónicos necesarios. Polo tanto, as solicitudes presentaranse obrigatoriamente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>

En consecuencia, no uso das atribucións que me confire o artigo 34 da Lei 1/1983, do 22 de febreiro, reguladora da Xunta e da súa Presidencia,

DISPOÑO:

Artigo 1. *Obxecto*

Establécense as bases reguladoras e procédese á convocatoria, en réxime de concorrencia competitiva e con sometemento aos principios de publicidade, obxectividade, transparencia, igualdade, mérito e capacidade, de nove bolsas de formación nos lectorados de lingua, literatura e cultura galegas para o 2026 (código de procedemento PL500E) nos centros de estudos galegos localizados nas universidades que se relacionan na táboa seguinte:

Destino	Localidade	País	Inicio	Remate
Universidade do Algarve	Faro	Portugal	1.10.2026	30.9.2029
Universitat Autònoma de Barcelona	Barcelona	España	1.10.2026	30.9.2029
Universitat de Barcelona	Barcelona	España	1.10.2026	30.9.2029
Universidad de Extremadura	Extremadura	España	1.10.2026	30.9.2029
Universidade Nova de Lisboa	Lisboa	Portugal	1.10.2026	30.9.2029
Università degli Studi di Padova	Pádua	Italia	1.10.2026	30.9.2029
Universidade do Estado do Río de Janeiro	Río de Janeiro	Brasil	1.1.2027	31.12.2029
Universidade de São Paulo	São Paulo	Brasil	1.1.2027	31.12.2029
Sveučilište u Zadru	Zadar	Croacia	1.10.2026	30.9.2029



Artigo 2. Duración

O programa de formación das persoas seleccionadas terá unha duración máxima de tres anos.

Artigo 3. Contía e libramento das bolsas

1. O importe íntegro mensual das bolsas obxecto desta convocatoria é o seguinte:

- 1.225,00 €, para aqueles lectorados localizados en universidades españolas.
- 1.378,00 €, para aqueles lectorados localizados en universidades estranxeiras.

2. Neste importe considéranse incluídos todos os conceptos; é dicir, as persoas beneficiarias asumirán, con cargo á bolsa adxudicada, os gastos de tipo profesional ou persoal que poidan derivar da súa condición, tales como: impostos, cotizacións á Seguridade Social, gastos de locomoción, manutención e residencia, custos de matrícula e gastos de inscrición en actividades formativas, trámites burocráticos, etc.

3. As persoas adxudicatarias percibirán o importe da súa bolsa mediante liquidacións mensuais, logo da certificación da persoa titular da Secretaría Xeral da Lingua que acredite que cumpriu, no período indicado, coas actividades estipuladas no artigo 5.

4. Estas persoas, de acordo co establecido no seu artigo 1, están incluídas no ámbito de aplicación do Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participan en programas de formación, en desenvolvemento do previsto na disposición adicional terceira da Lei 27/2011, do 1 de agosto, sobre actualización, adecuación e modernización do sistema da Seguridade Social, e quedan asimiladas a traballadores por conta allea, para os efectos da súa inclusión no réxime xeral da Seguridade Social.

Artigo 4. Orzamento

As axudas correspondentes financiaranse con cargo ás aplicacións orzamentarias 13.02.151A.480.2 (bolsas lectores e lectoras) e 13.02.151A.484.0 (cota patronal da Seguridade Social), dos orzamentos xerais da Comunidade Autónoma de Galicia, por unha contía máxima total de 433.353,24 €. Non obstante, esta contía poderá ser incrementada cando a cotización patronal á Seguridade Social, en virtude do regulado ao respecto na correspondente lei de orzamentos xerais do Estado e nas súas normas de aplicación e desenvolvemento, sexa actualizada á alza.



As contías e as anualidades, segundo as aplicacións orzamentarias, detállanse na seguinte táboa:

Aplicacións orzamentarias	Anualidades				
	2026	2027	2028	2029	Totais
13.02.151A.480.2	27.561,00 €	143.316,00 €	143.316,00 €	115.755,00 €	429.948,00 €
13.02.151A.484.0	220,71 €	1.135,08 €	1.135,08 €	914,37 €	3.405,24 €
Totais	27.781,71 €	144.451,08 €	144.451,08 €	116.669,37 €	433.353,24 €

Artigo 5. *Programa de formación*

O programa de formación, que terá un marcado carácter práctico, estará integrado por actividades relacionadas coa docencia, a programación e a organización de tarefas, a investigación, a difusión e a promoción da lingua, da literatura e da cultura galegas. As persoas adxudicatarias desenvolverán estas actividades, no marco do convenio asinado coas universidades de destino, baixo a dirección da persoa responsable do centro de estudos galegos e en permanente coordinación con esta.

As referidas actividades non se limitarán ao ámbito académico universitario, senón que tamén abranguerán a súa área de influencia.

A figura da persoa bolseira ten carácter exclusivamente formativo e non poderá, en ningún caso, dar lugar á existencia dunha relación laboral por conta allea nin á realización de funcións propias do persoal da universidade. A actividade desenvolvida deberá estar orientada á aprendizaxe e á adquisición de coñecementos, sen cubrir necesidades estruturais nin substituír postos de traballo.

Artigo 6. *Seguimento, control e avaliación*

A persoa responsable do centro de estudos galegos da universidade correspondente realizará o seguimento, control e avaliación do correcto desenvolvemento do programa de formación do lectorado para verificar o cumprimento das condicións establecidas na convocatoria.

As persoas bolseiras deberán desempeñar as funcións propias da bolsa conforme o programa de formación aprobado e as directrices establecidas, así como facilitar toda a información que lles sexa requirida para os efectos de seguimento e control. Así mesmo, estarán obrigadas a presentar un informe anual sobre o desenvolvemento do programa de formación, así como unha memoria final en que se recollan o grao de cumprimento dos obxectivos do programa e a valoración da experiencia desenvolvida.



A Secretaría Xeral da Lingua poderá solicitarlle á persoa responsable do centro de estudos galegos da universidade de destino informes complementarios ou información adicional sobre as actividades realizadas para comprobar o adecuado aproveitamento da bolsa.

As persoas bolseiras colaborarán coa Secretaría Xeral da Lingua na divulgación de actividades relacionadas coa promoción e difusión da lingua e da cultura galegas, sempre que sexan compatibles co carácter formativo da bolsa e coas tarefas propias desta.

Artigo 7. *Requisitos*

1. Poderán participar nesta convocatoria as persoas que cumpran os seguintes requisitos:

– Estar en posesión da nacionalidade española ou de calquera dos países membros da Unión Europea.

– Non padecer enfermidade ou limitacións físicas ou psíquicas que sexan incompatibles co desenvolvemento das actividades obxecto desta convocatoria.

– Non atoparse incluídas en ningunha das prohibicións sinaladas no artigo 10.2 da Lei 9/2007, do 13 de xuño, de subvencións de Galicia.

– Titulación académica:

a) Poderá solicitar as prazas ofertadas quen estea en posesión dalgunha das seguintes titulacións:

- Licenciatura en Filoloxía Galega.
- Licenciatura en Filoloxía Románica.
- Grao en Lingua e Literatura Galegas.
- Grao en Estudos de Galego e Español.
- Grao en Ciencias da Linguaxe e Estudos Literarios.
- Grao en Filoloxía Aplicada Galega e Española.
- Grao en Galego e Portugués: Estudos Lingüísticos e Literarios.

CVE-DOG: or55dno0-pdk8-uch1-nr32-uukq0d3h5zw5



b) Tamén se poderá presentar quen estea en posesión dalgunha das titulacións da área de Humanidades ou da área de Ciencias Sociais e Xurídicas, sempre que posúa o Celga 5 ou 18 créditos de lingua galega e mais o Celga 4. Para as universidades de fóra de España, deberá acreditar 21 créditos en materias da lingua oficial do país no que se localice o lectorado solicitado ou, no canto destes, 21 créditos en materias de inglés.

2. Tamén poderán participar os lectores ou lectoras que, antes de rematar o período máximo de estadía, se visen obrigados a cesar na súa condición por causas alleas á súa vontade, sempre que esta circunstancia non derive da resolución dun procedemento de tipo disciplinario.

3. Quedan excluídas aquelas persoas que sexan lectoras bolseiras de lingua, literatura e cultura galegas, ou que o fosen no seu momento, agás nos supostos de cobertura provisional previstos no artigo 20.

Artigo 8. *Presentación de solicitudes*

1. A capacidade técnica e formación universitaria do colectivo de persoas físicas ás que van dirixidas estas bolsas permítelles o acceso e dispoñibilidade dos recursos electrónicos necesarios para se relacionaren por este medio co sector público autonómico. Por esta razón, as solicitudes presentaranse obrigatoriamente por medios electrónicos a través do formulario normalizado dispoñible na sede electrónica da Xunta de Galicia (<https://sede.xunta.gal>).

De conformidade co artigo 68.4 da Lei 39/2015, do 1 de outubro, do procedemento administrativo común das administracións públicas, se algunha das persoas interesadas presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela en que fose realizada a emenda.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

2. As persoas interesadas poderán solicitar, como máximo, tres destinos que deberán relacionar no anexo I por orde de preferencia.

3. Se a solicitude non reúne os requisitos exixidos no artigo 7, notificaráselle á persoa interesada para que, nun prazo de dez días, emende os erros ou acompañe os documentos



preceptivos. Unha vez que transcorra este prazo sen que se produza a emenda, considerase que desiste da súa petición.

Artigo 9. *Notificacións*

1. As notificacións de resolucións e actos administrativos practicaranse só por medios electrónicos, nos termos previstos na normativa reguladora do procedemento administrativo común.

2. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do sistema de notificacións electrónicas de Galicia Notifica.gal. Este sistema remitiralles ás persoas interesadas avisos da posta á disposición das notificacións á conta de correo e/ou ao teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

3. De conformidade co artigo 47 da Lei 4/2019, do 17 de xullo, de administración dixital de Galicia, as persoas interesadas deberán crear e manter o seu enderezo electrónico habilitado único a través do sistema de notificación electrónica de Galicia Notifica.gal para todos os procedementos administrativos tramitados pola Administración xeral e as entidades instrumentais do sector público autonómico. En todo caso, a Administración xeral e as entidades do sector público autonómico de Galicia poderán crear o indicado enderezo de oficio, para os efectos de asegurar o cumprimento por parte das persoas interesadas da súa obriga de relacionarse por medios electrónicos.

4. As notificacións entenderanse practicadas no momento en que se produza o acceso ao seu contido, e considerase rexeitada cando transcorran dez días naturais desde a posta á disposición da notificación sen que se acceda ao seu contido.

5. Se o envío da notificación electrónica non é posible por problemas técnicos, practicarase a notificación polos medios previstos na normativa reguladora do procedemento administrativo común.

Artigo 10. *Prazo de presentación*

1. O prazo de presentación das solicitudes e da documentación sinalada no artigo 12 será dun mes contado a partir do día seguinte ao da publicación desta orde no *Diario Oficial de Galicia*.

CVE-DOG: or55dno0-pdk8-uch1-nr32-uukq0d3h5zw5



2. Rematado o prazo de presentación de solicitudes e o establecido para a súa emenda, publicaranse na páxina web da Secretaría Xeral da Lingua e no seu taboleiro de anuncios as listaxes provisionais de admitidos/as, excluídos/as, con indicación da causa que orixina esta situación, e desistidos/as.

Á vista das listaxes anteriores, as persoas interesadas disporán dun prazo de cinco días para presentar reclamación.

Artigo 11. *Trámites administrativos posteriores á presentación da solicitude*

Todos os trámites administrativos que as persoas interesadas deban realizar tras a presentación da solicitude deberán ser efectuados electronicamente accedendo á Carpeta cidadá da persoa interesada dispoñible na sede electrónica da Xunta de Galicia.

Artigo 12. *Documentación complementaria*

1. As persoas interesadas deberán achegar coa solicitude, a seguinte documentación:

a) Documento acreditativo da súa identidade (no caso de persoas solicitantes estranxeiras).

b) Currículo, en que deben figurar todos os méritos alegados.

c) Xustificantes dos méritos alegados no currículo (na mesma orde na que aparezan relacionados neste).

d) Para cada destino solicitado, proxecto didáctico de docencia en prácticas aplicable á universidade solicitada, que incluírá como primeira epígrafe a explicación dos motivos da súa solicitude. Non se terá en conta ningún proxecto que se achegue fóra do prazo de presentación de solicitudes.

A extensión do proxecto didáctico non deberá superar as 25 páxinas, redactadas en soporte dixital cun interliñado de espazo e medio, tipo de letra non superior a 14 puntos e presentadas en formato A4.

e) No caso de titulacións de universidades estranxeiras, unha copia da titulación universitaria exixida no artigo 7 ou da acreditación de que foi solicitada.

CVE-DOG: or55dno0-pdk8-uch1-nr32-uukq0d3h5zw5



f) En relación coa titulación esixida (persoas nacionais ou estranxeiras), unha copia da certificación académica persoal ou acreditación de que foi solicitada, na cal debe constar a nota media do expediente académico, calculada en función do disposto na Resolución do 15 de setembro de 2011, da Secretaría Xeral Técnica, da Consellería de Educación e Ordenación Universitaria (*Diario Oficial de Galicia* núm. 188, do 30 de setembro).

2. De conformidade co artigo 28.3 da Lei 39/2015, do 1 de outubro, do procedemento administrativo común, non será necesario achegar os documentos que xa fosen presentados anteriormente pola persoa interesada ante calquera Administración. Neste caso, a persoa interesada deberá indicar en que momento e ante que órgano administrativo presentou estes documentos, que serán obtidos electronicamente a través das redes corporativas ou mediante consulta ás plataformas de intermediación de datos ou outros sistemas electrónicos habilitados para o efecto, agás que conste no procedemento a oposición expresa da persoa interesada.

De forma excepcional, no caso de que non se puidesen obter os citados documentos, poderán solicitárselle novamente á persoa interesada.

3. A documentación complementaria deberá presentarse electronicamente.

Se algunha das persoas interesadas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela en que fose realizada a emenda.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar, de maneira motivada, o cotexo das copias achegadas pola persoa interesada, para o que poderá requirir a exhibición do documento ou da información orixinal.

4. Sempre que se realice a presentación de documentos separadamente da solicitude, deberase indicar o código e o órgano responsable do procedemento, o número de rexistro de entrada da solicitude e o número de expediente, se se dispón del.

5. No caso de que algún dos documentos que haxa que presentar de forma electrónica supere os tamaños máximos ou teña un formato non admitido pola sede electrónica da Xunta



de Galicia, permitírase a presentación deste de forma presencial dentro dos prazos previstos e na forma indicada no número anterior. A información actualizada sobre o tamaño máximo e os formatos admitidos pode consultarse na sede electrónica da Xunta de Galicia.

6. Na presentación da documentación gardarase a seguinte orde: solicitude, documento acreditativo da identidade (de ser o caso), titulación académica, certificación académica persoal, currículo, xustificantes dos méritos alegados neste (na mesma orde en que aparecen relacionados nel) e proxecto ou proxectos didácticos.

Artigo 13. *Comprobación de datos*

Para a tramitación deste procedemento consultarase automaticamente os datos incluídos nos seguintes documentos en poder da Administración actuante ou elaborados polas administracións públicas, agás que a persoa interesada se opoña á súa consulta:

- a) DNI ou NIE da persoa solicitante.
- b) Consulta de títulos universitarios oficiais (no caso de titulacións expedidas por universidades españolas).

2. No caso de que as persoas interesadas se opoñan á consulta, deberán indicalo no recadro correspondente habilitado no formulario correspondente e achegar os documentos.

Cando así o exixa a normativa aplicable, solicitarase o consentimento expreso da persoa interesada para realizar a consulta.

3. Excepcionalmente, no caso de que algunha circunstancia imposibilite a obtención dos citados datos, poderáselles solicitar ás persoas interesadas que presenten os documentos correspondentes.

Artigo 14. *Órgano instructor*

A instrución do procedemento para a concesión das bolsas de formación nos lectorados de lingua, literatura e cultura galegas correspóndelle á Subdirección Xeral de Política Lingüística.

CVE-DOG: or55dno0-pdk8-uch1-nr32-uukq0d3h5zw5



Artigo 15. Comisión de Valoración

1. Os méritos alegados polas persoas solicitantes serán valorados por unha comisión integrada polos seguintes membros:

a) A persoa titular da Subdirección Xeral de Política Lingüística, que ocupará a presidencia.

b) A persoa titular da Xefatura do Servizo de Formación, Asesoramento e Proxección Exterior da Lingua.

c) A persoa titular da Xefatura de Sección de Acción Exterior.

d) Por parte das universidades, as persoas responsables dos centros de estudos galegos. Se a súa presenza non for posible, notificaranllo á Secretaría Xeral da Lingua, que pode delegar a súa representación. Ambas as circunstancias deben comunicarse por escrito.

e) Un funcionario ou funcionaria da Secretaría Xeral da Lingua, que actuará de secretario ou secretaria, con voz pero sen voto.

2. A ausencia dalgún dos membros da Administración será cuberta por algún dos seguintes suplentes:

a) A persoa titular da Subdirección Xeral de Planificación e Dinamización Lingüística, que exercerá a presidencia.

b) A persoa titular da Xefatura do Servizo de Xestión e Promoción Lingüística.

c) A persoa titular da Xefatura da Sección de Validación de Estudos.

3. A Comisión de Valoración poderá acordar a incorporación ás súas reunións de persoal de carácter técnico que contribúa a unha correcta valoración dos méritos alegados polas persoas aspirantes ou a aclarar as dúbidas que lles poidan xurdir aos membros da comisión. Este persoal actuará con voz pero sen voto nas reunións da citada comisión.



Artigo 16. Valoración de méritos

1. A comisión reunirse para valorar os méritos debidamente acreditados de cada unha das solicitudes admitidas, de acordo cos criterios que se indican no anexo II desta orde.

2. Cando o número de solicitudes admitidas para un mesmo destino supere a contía de doce, limitarase o acceso á fase de exposición e defensa do proxecto didáctico aos doce candidatos e candidatas que acaden as maiores puntuacións nos méritos indicados nos apartados 1, 2, 3 e 4 do anexo II.

En calquera caso, non accederán á fase anterior aquelas persoas candidatas que non presentasen o proxecto didáctico en prazo.

3. A Secretaría Xeral da Lingua publicará na súa páxina web institucional e comunicarálles ás persoas solicitantes, a través do enderezo de correo electrónico facilitado, a relación das candidatas e candidatos seleccionados para a fase de exposición e defensa do proxecto didáctico, así como o lugar, a data e a hora de realización.

4. Será causa específica de desistencia non presentarse á exposición e á defensa do proxecto didáctico. Non se considerará desistencia cando a ausencia estea debidamente xustificada por causa de forza maior, enfermidade ou impedimento legalmente acreditado.

5. Unha vez rematada a valoración de méritos, a comisión remitiralle á persoa titular do órgano instructor do procedemento a acta da reunión. Esta acta recollerá, ordenados de maior a menor puntuación total e por cada destino solicitado, a relación de candidatas e candidatos valorados e indicará detalladamente as puntuacións obtidas en cada apartado e as incidencias que puidesen influír na resolución desta convocatoria.

6. En caso de empate, a orde virá dada pola puntuación total obtida en cada apartado do anexo II, conforme a orde establecida no devandito anexo.

7. Os méritos alegados no currículo xustificaranse na forma indicada para a documentación complementaria. Os xustificantes disporanse a continuación do currículo, na mesma orde en que aparezan relacionados neste.

Non se valorará ningún mérito que non conste explicitamente no currículo ou que, no caso de figurar, non se xustifique adecuadamente ou se faga fóra do prazo de presentación de solicitudes.

CVE-DOG: or55dno0-pdk8-uch1-nr32-uukq0d3h5zw5



No caso de publicacións, xustificaranse mediante o envío dixital da obra, á cal se engadirán, se é o caso, a capa, a contracapa, a folla que conteña o ISBN, ISSN ou depósito legal e o índice. De tratarse de publicacións extensas, permitirase a presentación destas de forma presencial dentro dos prazos previstos.

Os xustificantes dos méritos redactados nun idioma distinto aos oficiais en Galicia, para seren valorados, deberán acompañarse dunha tradución a algún destes, e incluírán ao pé unha declaración responsable asinada cunha lenda que faga constar que se trata dunha tradución fiel do documento.

Artigo 17. *Proposta de resolución*

1. O órgano instrutor, tendo en conta a acta da Comisión de Valoración e o expediente de cada unha das solicitudes presentadas, formulará unha proposta de resolución provisional baseada nas maiores puntuacións obtidas.

A adxudicación non poderá recaer sobre aquelas persoas candidatas que teñan unha valoración total inferior a 5 puntos.

2. Esta proposta de resolución provisional exporase a información pública, na páxina web da Secretaría Xeral da Lingua, por un prazo de dez días contados a partir do seguinte á data de publicación. Durante este prazo, as persoas interesadas poderán presentar as alegacións que xulguen pertinentes de acordo co establecido no artigo 8.

3. Se algunha das persoas candidatas propostas tivese a intención de non aceptar a adxudicación da bolsa, deberá comunicalo expresamente dentro do prazo de alegacións e proporase o seguinte con maior puntuación. Ante o rexeitamento deste, ofreceráselle á persoa situada a continuación, e así sucesivamente ata a súa cobertura.

4. Logo de rematar o prazo de alegacións e examinadas estas, se as houber, formularase a proposta de resolución definitiva.

Artigo 18. *Resolución*

1. O prazo máximo para resolver a convocatoria será de catro meses, contados a partir da data de publicación desta orde no *Diario Oficial de Galicia*. De non se resolver neste prazo, as solicitudes entenderanse desestimadas.



2. A persoa titular do órgano instrutor dirixiralle á persoa titular da Secretaría Xeral da Lingua a proposta de resolución definitiva.

3. Con base na proposta de resolución definitiva, a persoa titular da Secretaría Xeral da Lingua ditará a resolución pola que se adxudican as bolsas de formación nos lectorados de lingua, literatura e cultura galegas convocadas por medio desta orde. Esta resolución publicarase no *Diario Oficial de Galicia*, exporase na web da Secretaría Xeral da Lingua e notificaráselles ás correspondentes universidades de destino.

4. O persoal funcionario en servizo activo non poderá resultar adxudicatario da bolsa sen obter previamente o pase á situación administrativa correspondente, por ser incompatible co desempeño dun posto de traballo na Administración pública.

5. Para os efectos do estipulado nos artigos 20 e 21 e para cada destino ofertado, elaborárase unha listaxe de suplentes con aquelas solicitudes que, respectando a orde de prelación por puntuación, estean situadas a continuación da persoa adxudicataria e que acaden, como mínimo, unha puntuación total igual a 5.

6. Non se adxudicarán as bolsas daqueles destinos que non contén, no momento de ditar a resolución, co correspondente convenio de colaboración asinado entre a Consellería de Cultura, Lingua e Xuventude e a respectiva universidade. Non obstante, esta adxudicación poderá demorarse se existe a certeza de que o convenio será subscrito dentro dos dous meses seguintes á adxudicación das restantes bolsas.

7. A concesión e percepción da bolsa ten carácter estritamente formativo e non implicará, en ningún caso, a existencia de relación laboral nin de natureza similar entre a Xunta de Galicia e as persoas beneficiarias.

8. Toda alteración das condicións tidas en conta para a concesión da bolsa e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación da resolución de concesión.

Artigo 19. *Obrigas das persoas beneficiarias*

1. As persoas adxudicatarias quedan obrigadas a:

a) Comunicarlle á Secretaría Xeral da Lingua o desenvolvemento de actividades alleas ao obxecto desta convocatoria que poidan influír ou comprometer a súa actuación.

CVE-DOG: or55dno0-pdk8-uch1-nr32-uukq0d3h5zw5



- b) Reintegrar os importes das bolsas indebidamente percibidos.
- c) Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións.
- d) Obter, se é o caso, os permisos pertinentes para unha estadía legal no país de destino, para o cal deben realizar os trámites oportunos e asumir os gastos correspondentes.
- e) Asistir ás actividades de formación a que sexan convocadas por parte da Secretaría Xeral da Lingua.
- f) Cumprir as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30.2 da Lei 15/2014, do 16 de setembro, de racionalización do sector público e outras medidas de reforma administrativa.

As persoas adxudicatarias destinadas en universidades estranxeiras situadas en cidades en que haxa centros do Instituto Cervantes poderán desenvolver cursos de lingua e cultura galegas neses centros, baixo a supervisión e a coordinación destes, así como colaborar noutras actividades conxuntas a prol da promoción da lingua e da cultura galegas.

2. No caso de incumprimento das súas obrigas, deberán proceder ao reintegro das cantidades xa percibidas xunto cos xuros de mora que lle correspondan en cada caso, salvo en casos excepcionais autorizados pola Secretaría Xeral da Lingua.

3. O incumprimento de calquera das condicións recollidas nesta orde e demais normas aplicables poderá constituír causa determinante de revogación da axuda e do reintegro total ou parcial das cantidades percibidas, xunto cos xuros de mora que lle puidesen corresponder en cada caso, en aplicación do disposto no artigo 33 e seguintes da Lei 9/2007, do 13 de xuño, de subvencións de Galicia, e no Decreto 11/2009, do 8 de xaneiro, polo que aproba o Regulamento da Lei 9/2007, do 13 de xuño, de subvencións de Galicia.

4. A concesión das axudas reguladas nesta orde será obxecto de inscrición no Rexistro Público de Subvencións dependente da Consellería de Facenda e Administración Pública, co fin da ordenación e coñecemento da actividade subvencionable en Galicia. Por outra parte, de conformidade co previsto nos artigos 17.3.b) e 20.8.a) da Lei 38/2003, do 17 de



novembro, xeral de subvencións, transmitirase á Base de datos nacional de subvencións a información requirida por esta, o texto da convocatoria para a súa publicación na citada base e o seu extracto no *Diario Oficial de Galicia*.

Artigo 20. *Substitucións*

1. Se unha vez adxudicadas as bolsas algunha das persoas beneficiarias renunciase, aplicarase para a súa cobertura provisional o procedemento descrito no artigo 17.3 sobre a listaxe de suplentes a que fai referencia o artigo 18.5. Estas bolsas serán incluídas na seguinte convocatoria para a súa adxudicación mediante concurso público de méritos.

2. Cando sexa necesaria a substitución temporal do bolseiro ou da bolseira titular, empregarase tamén o procedemento descrito no punto anterior. Esta substitución abranguerá o período que dure a causa que a orixina.

Artigo 21. *Listaxe de agarda xeral*

Para os efectos de facilitar a cobertura das prazas que aínda queden vacantes despois de aplicar o disposto no artigo 20, referido á listaxe de suplentes de cada destino, a Secretaría Xeral da Lingua elaborará unha listaxe de espera xeral con todos os participantes que non acadaron praza, ordenadas estas conforme a puntuación obtida nos puntos 1 e 2 do anexo II.

No caso de empate, terá preferencia quen conte cun maior nivel de coñecemento do idioma ou idiomas do país ou comunidade autónoma correspondentes á praza vacante. No caso de persistir o empate, este resolverase a favor de quen conte con maior puntuación na suma dos puntos 1.1, 1.2 e 1.3 do anexo II.

Esta listaxe de agarda xeral só será de aplicación no caso de que a bolsa que se pretende cubrir non conte con listaxe de suplentes propia. Estas bolsas serán incluídas na seguinte convocatoria para a súa adxudicación mediante concurso público de méritos.

Artigo 22. *Revogación e suspensión*

A Secretaría Xeral da Lingua, logo da instrución do correspondente procedemento, poderá revogar a concesión da bolsa, ou suspendela temporalmente, cando conorra algunha das seguintes circunstancias:

a) Evolución negativa ou pouco satisfactoria na súa formación e no aproveitamento das experiencias e prácticas realizadas no lectorado.



- b) Incumprimento total ou parcial do disposto nos artigos 5 e 6 desta orde.
- c) Notoria falta de actitude no desenvolvemento das actividades previstas nos artigos 5 e 6.
- d) Non axustarse, no exercicio das súas actividades, ás vixentes Normas ortográficas e morfolóxicas do idioma galego, aprobadas pola Real Academia Galega.
- e) Coñecemento sobrevido de circunstancias invalidantes para a adxudicación da bolsa.
- f) Perda de vixencia do convenio asinado coa universidade de destino.
- g) Calquera actuación que afecte o correcto funcionamento do lectorado.

Artigo 23. *Transparencia e bo goberno*

1. Deberán cumprirse as obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

2. En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a lle subministrar á Administración, ao organismo ou a calquera das entidades previstas no artigo 3.1 da Lei 1/2016, do 18 de xaneiro, a que se atopen vinculadas, con requirimento previo, a información necesaria para o cumprimento por parte daquela das obrigas previstas no título I da citada lei.

Artigo 24. *Réxime xurídico*

O réxime xurídico aplicable a esta convocatoria é o seguinte: Lei 9/2007, do 13 de xuño, de subvencións de Galicia (DOG núm. 121, do 25 de xuño); Decreto 11/2009, do 8 de xaneiro, polo que se aproba o Regulamento da Lei 9/2007 (DOG núm. 20, do 29 de xaneiro); os preceptos declarados básicos pola disposición derradeira primeira da Lei 38/2003, do 17 de novembro, xeral de subvencións (BOE núm. 276, do 18 de novembro) e Real decreto 887/2006, do 21 de xullo, polo que se aproba o Regulamento da Lei 38/2003 (BOE núm. 176, do 25 de xullo).



Artigo 25. Recursos

Contra esta orde, que pon fin á vía administrativa, as persoas interesadas poderán interpoñer recurso potestativo de reposición perante a persoa titular da Consellería de Cultura, Lingua e Xuventude no prazo dun mes, contado a partir do día seguinte ao da súa publicación no *Diario Oficial de Galicia*, segundo o disposto nos artigos 123 a 125 da Lei 39/2015, do 1 de outubro, do procedemento administrativo común das administracións públicas ou ben, directamente, recurso contencioso-administrativo perante o Tribunal Superior de Xustiza de Galicia, no prazo de dous meses, contados a partir do día seguinte ao da súa publicación, segundo dispoñen os artigos 10 e 46 da Lei 29/1998, do 13 de xullo, reguladora da xurisdición contencioso-administrativa.

Disposición adicional. Delegación de atribucións

Única. Deléganse expresamente na persoa titular da Secretaría Xeral da Lingua as facultades de resolución que deriven da aplicación dos artigos 15, 17 e 18 desta orde, con base no establecido na disposición adicional primeira da Orde do 28 de xuño de 2024 de delegación de competencias nos órganos superiores e de dirección da Consellería de Cultura, Lingua e Xuventude, así como a resolución dos recursos de reposición que, se é o caso, se interpoñan contra os actos administrativos ditados no exercicio das facultades delegadas, conforme o disposto no seu artigo segundo, alínea g).

Disposición derradeira primeira

A persoa titular da Secretaría Xeral da Lingua poderá ditar, no ámbito das súas competencias, cantos actos e medidas sexan precisas para o desenvolvemento desta orde.

Disposición derradeira segunda

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 15 de maio de 2026

O conselleiro de Cultura, Lingua e Xuventude

P.D. (Orde do 28.6.2024)

Elvira Mª Casal García

Secretaría xeral técnica da Consellería de Cultura, Lingua e Xuventude

CVE-DOG: or55dno0-pdk8-uch1-nr32-uukq0d3h5zw5



XUNTA
DE GALICIACONSELLERÍA DE
CULTURA, LINGUA
E XUVENTUDE

ANEXO I

PROCEDEMENTO	CÓDIGO DE PROCEDEMENTO	DOCUMENTO
CONVOCATORIA DE LECTORADOS DE LINGUA, LITERATURA E CULTURA GALEGAS	PL500E	SOLICITUDE

DATOS DA PERSOA SOLICITANTE

IDENTIFICACIÓN

TIPO	NÚM.	PAÍS EMISOR

NOME	PRIMEIRO APELIDO	SEGUNDO APELIDO

ENDEREZO

PAÍS

TIPO	NOME DA VÍA	NÚM.	BLOQ.	ANDAR	PORTA

CÓDIGO POSTAL	PROVINCIA	CONCELLO	LOCALIDADE

PARROQUIA	LUGAR

CONTACTO

PREFIXO	TELÉFONO MÓBIL	PREFIXO	OUTRO TELÉFONO

CORREO ELECTRÓNICO

E NA SÚA REPRESENTACIÓN (deberá acreditarse a representación fidedigna por calquera medio válido en dereito)

IDENTIFICACIÓN

TIPO	NÚM.	PAÍS EMISOR

NOME/RAZÓN SOCIAL	PRIMEIRO APELIDO	SEGUNDO APELIDO

DATOS PARA OS EFECTOS DE NOTIFICACIÓN

Todas as notificacións ás persoas interesadas se realizarán só por medios electrónicos a través do Sistema de notificación electrónica de Galicia - [Notifica.gal](https://notifica.xunta.gal) (<https://notifica.xunta.gal>).

Só se poderá acceder á notificación co certificado electrónico ou Chave365.

Envíananse avisos da posta á disposición da notificación no correo electrónico e/ou teléfono móbil facilitados a seguir e que poderán cambiar en calquera momento a través de [Notifica.gal](https://notifica.gal):

PREFIXO	TELÉFONO MÓBIL	CORREO ELECTRÓNICO

XUNTA
DE GALICIA

ISSN1130-9229

Depósito legal C.494-1998

<https://www.xunta.gal/diario-oficial-galicia>

DATOS BANCARIOS

☒ Formato IBAN☐ Formato BIC

Declaro, baixo a miña responsabilidade, que son certos os datos consignados relativos á conta bancaria indicada.

TITULAR DA CONTA

NÚMERO DE CONTA BANCARIA (24 DÍXITOS)

IBAN

UNIVERSIDADES QUE SOLICITA (relacionar por orde de preferencia)

1º

2º

3º

A PERSOA SOLICITANTE OU REPRESENTANTE DECLARA:

1. Que, en relación con outras axudas concedidas ou solicitadas:

- ☐ Non solicitou nin se lle concedeu ningunha outra axuda para este mesmo proxecto ou conceptos para os cales se solicita esta subvención.
- ☐ Si solicitou e/ou se lle concederon outras axudas para este mesmo proxecto ou conceptos para os cales se solicita esta subvención, que son as que a seguir se relacionan:

ORGANISMO	IMPORTE (€)

2. Que todos os datos contidos nesta solicitude e nos documentos que se achegan son certos.
3. Non estar incurso en ningunha das circunstancias previstas no artigo 13 da Lei 38/2003, do 17 de novembro, xeral de subvencións.
4. Non estar incurso en ningunha clase de inhabilitación para a obtención de axudas previstas nos puntos 2 e 3 do artigo 10 da Lei 9/2007, do 13 de xuño, de subvencións de Galicia.
5. Estar ao día no pagamento de obrigas por reintegro de subvencións, conforme o artigo 10.2.g) da Lei 9/2007, do 13 de xuño, de subvencións de Galicia, e o artigo 9 do Regulamento de subvencións de Galicia, aprobado polo Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.
6. Que está ao día no cumprimento das obrigas tributarias e fronte á Seguridade Social e que non ten pendente de pagamento ningunha débeda coa Administración pública da Comunidade Autónoma de Galicia e que se compromete a manter o cumprimento das citadas obrigas durante o período de tempo inherente ao recoñecemento ou exercicio do dereito ao cobramento da axuda.
7. Que en relación coa condición de persoal funcionario:
- ☐ Non ten a condición de persoal funcionario.
- ☐ Ten a condición de persoal funcionario e:
- ☐ Non está en servizo activo
- ☐ Está en servizo activo e pertence ao corpo

non obstante, comprométese a solicitar o pase á correspondente situación administrativa, no caso de ser seleccionada.



XUNTA
DE GALICIACONSELLERÍA DE
CULTURA, LINGUA
E XUVENTUDEANEXO I
(continuación)

DOCUMENTACIÓN QUE SE PRESENTA OU XA PRESENTADA CON ANTERIORIDADE

☐ Documento acreditativo da súa identidade (no caso de solicitantes estranxeiros)☐ Currículo☐ Xustificante dos méritos alegados no currículo☐ Para cada destino solicitado, proxecto didáctico de docencia en prácticas

	ÓRGANO	CÓD. PROC.	ANO
☐ Copia da titulación universitaria (no caso de titulacións de universidades estranxeiras)			
☐ En relación coa titulación exixida (nacionais ou estranxeiros), copia da certificación académica persoal ou acreditación de que foi solicitada, con expresión da nota media do expediente académico.			

COMPROBACIÓN DE DATOS

Os documentos relacionados serán obxecto de consulta ás administracións públicas. No caso de que as persoas interesadas se opoñan a esta consulta, deberán indicalo no recadro correspondente e achegar unha copia dos documentos.

OPÓÑOME Á
CONSULTA

DNI/NIE da persoa solicitante

☐

Consulta de títulos universitarios oficiais (no caso de titulacións expedidas por universidades españolas)

☐

INFORMACIÓN BÁSICA SOBRE A PROTECCIÓN DE DATOS PERSOAIS

Responsable do tratamento	Xunta de Galicia. Consellería de Cultura, Lingua e Xuventude
Finalidades do tratamento	Tramitar este procedemento, verificar os datos e documentos que a persoa interesada achegue na súa solicitude para comprobar a exactitude destes, levar a cabo as actuacións administrativas que deriven e informar sobre o estado de tramitación. Así mesmo, os datos persoais incluíranse na Carpeta cidadá de cada persoa interesada para facilitar o acceso á información, tanto persoal como de carácter administrativo.
Lexitimación para o tratamento	Cumprimento dun deber legal aplicable ao responsable do tratamento. En concreto, a competencia e obrigas previstas nos preceptos básicos da Lei 38/2003, do 17 de novembro, xeral de subvencións, e da Lei 19/2013, do 9 de decembro, de transparencia, acceso á información pública e bo goberno; así como na Lei 9/2007, do 13 de xuño, de subvencións de Galicia, na Lei 39/2015, do 1 de outubro, do procedemento administrativo común das administracións públicas, na Lei 1/2016, do 18 de xaneiro, de transparencia e bo goberno, e na Lei 4/2019, do 17 de xullo, de administración dixital de Galicia.
Destinatarias dos datos	As administracións públicas no exercicio das súas competencias.
Exercicio de dereitos	As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, de ser o caso, o consentimento outorgado a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en (https://www.xunta.gal/exercicio-de-dereitos).
Contacto coa persoa delegada de protección de datos e máis información	(https://www.xunta.gal/informacion-xeral-proteccion-datos)

XUNTA
DE GALICIA

ISSN1130-9229

Depósito legal C.494-1998

<https://www.xunta.gal/diario-oficial-galicia>

**XUNTA
DE GALICIA****CONSELLERÍA DE
CULTURA, LINGUA
E XUVENTUDE****ANEXO I**
(continuación)**LEXISLACIÓN APLICABLE**

- Orde do 15 de maio de 2026 pola que se aproban as bases e se anuncia a convocatoria pública de bolsas de formación nos lectorados de lingua, literatura e cultura galegas para o 2026 (código de procedemento PL500E).

SINATURA DA PERSOA SOLICITANTE OU REPRESENTANTE

Lugar e data

 , de de **Xacobeo**  **2027**

Secretaría Xeral da Lingua

CVE-DOG: or55dno0-pdk8-uch1-nr32-uukq0d3h5zw5

**XUNTA
DE GALICIA**

ISSN1130-9229

Depósito legal C.494-1998

<https://www.xunta.gal/diario-oficial-galicia>

ANEXO II

Méritos	Puntuacións
1. Formación:	Máximo 18 puntos
1.1. Polo título de doutoramento:	2 puntos
1.2. Por cada licenciatura ou titulación de grao a maiores da exixida, 1 punto:	Ata 2 puntos
1.3. Expediente académico: Valorarase segundo a nota media calculada en función do disposto na Resolución da Secretaría Xeral Técnica da Consellería de Educación e Ordenación Universitaria do 15 de setembro de 2011 (DOG núm. 188, do 30 de setembro) e acreditarase mediante certificación académica persoal. A puntuación así obtida tomarase, con dous decimais, pola metade do seu valor:	Ata 5 puntos
1.4. Estar en posesión dalgunha das titulacións detalladas no artigo 6, punto 1, letra a):	2 puntos
1.5. Estar en posesión da licenciatura ou grao en Tradución e Interpretación	1 punto
1.6. Asistencia a cursos de formación didáctica no ensino de linguas ¹ :	Ata 3 puntos
1.6.1. Ata 25 horas	0,25 puntos
1.6.2. De 26 a 50 horas	0,50 puntos
1.6.3. De 51 a 100 horas	0,75 puntos
1.6.4. Máis de 100 horas	1,00 puntos
1.7. Asistencia a actividades de formación relacionadas coa lingua, a literatura e a cultura galegas:	Ata 3 puntos
1.7.1. Ata 25 horas	0,05 puntos
1.7.2. De 26 a 50 horas	0,10 puntos
1.7.3. De 51 a 100 horas	0,15 puntos
1.7.4. Máis de 100 horas	0,20 puntos
2. Actividade docente e/ou divulgativa e publicacións:	Máximo 7 puntos
2.1. Impartición de cursos, seminarios, relatorios, etc., relacionados coa lingua, a literatura e a cultura galegas ² :	Ata 2 puntos
2.1.1. De 0 a 10 horas	0,05 puntos
2.1.2. De 11 a 25 horas	0,10 puntos
2.1.3. De 26 a 50 horas	0,15 puntos
2.1.4. De 51 a 100 horas	0,20 puntos
2.1.5. Máis de 100 horas	0,25 puntos
2.2. Organización de actividades de difusión e promoción da lingua, a literatura e a cultura galegas (dirección e/ou coordinación): Cando estas actividades se realizasen en universidades de fóra de Galicia valoraranse exclusivamente no punto 3.1.	Ata 1 punto
2.2.1. Ata 25 horas	0,05 puntos
2.2.2. De 26 a 50 horas	0,10 puntos
2.2.3. De 51 a 100 horas	0,15 puntos
2.2.4. Máis de 100 horas	0,20 puntos
2.3. Publicacións relacionadas coa lingua, a literatura e a cultura galegas: Acreditaranse mediante orixinais ou copias dixitais en que consten o ISBN, ISSN ou depósito legal, segundo corresponda, e o índice (non se valorarán as publicacións que non o consignan). Non se valorarán as publicacións de autoría múltiple.	Ata 2 puntos
2.3.1. Libros:	0,50 puntos
2.3.2. Relatorios, artigos, recensións, etc.:	0,10 puntos
2.3.3. Material audiovisual:	0,10 puntos
2.4. Docencia no ensino regrado de lingua, literatura e cultura galegas: Valorarase con 0,05 puntos por cada mes ou fracción inferior.	Ata 2 puntos
3. Dinamización e coñecementos:	Máximo 5 puntos
3.1. Organización de actividades de difusión e promoción da lingua, da literatura e da cultura galegas, en universidades de fóra de Galicia (dirección e/ou coordinación):	Ata 1 punto



Méritos	Puntuacións
3.1.1. Ata 25 horas	0,20 puntos
3.1.2. De 26 a 50 horas	0,40 puntos
3.1.3. De 51 a 100 horas	0,60 puntos
3.1.4. Máis de 100 horas	0,80 puntos
3.2. Coñecemento do país ou da comunidade autónoma en que se encontre a universidade solicitada (acreditación exclusiva mediante residencia):	Ata 1 punto
3.3. Nivel de coñecemento do idioma ou idiomas propios do país ou da comunidade autónoma de destino (distintos ao galego ou castelán):	Ata 3 puntos
3.3.1. MCERL ³ A2/ALTE ⁴ 1	0,50 puntos
3.3.2. MCERL B1/ALTE 2	0,75 puntos
3.3.3. MCERL B2/ALTE 3	1,00 puntos
3.3.4. MCERL C1/ALTE 4	1,25 puntos
3.3.5. MCERL C2/ALTE 5	1,50 puntos
3.3.6. Outros (ensino non regrado)	0,15 puntos
4. Adecuación do currículo presentado ao perfil formativo do destino solicitado:	Máximo 5 puntos
5. Exposición e defensa ante a Comisión de Valoración do proxecto didáctico de docencia en prácticas, investigador e difusor da lingua, a literatura e a cultura galegas que se desenvolverá na universidade solicitada: Valorarase tendo en conta os seguintes criterios: 5.1. Adecuación ao destino solicitado (ata 1 punto): • Motivación fundamentada para o destino solicitado (claridade, coherencia e relación co perfil académico). • Coñecemento da universidade solicitada (referencia a estudos, liñas académicas, estrutura ou contexto universitario). • Coñecemento da actividade do Centro de Estudos Galegos (CEG) (actividades, funcións e liñas de actuación). • Coñecemento do país ou da comunidade autónoma en que se localiza o Centro de Estudos Galegos (CEG) (referencia ao contexto (socio)lingüístico, cultural ou educativo). 5.2. Deseño e calidade do proxecto docente (ata 3 puntos): • Estruturación e coherencia do proxecto (claridade na organización, obxectivos, contidos e secuenciación). • Coñecementos e fundamentación teórica (referencia a enfoques didácticos, marcos teóricos ou metodoloxías). • Deseño das actividades (variedade, adecuación e carácter práctico). • Aplicabilidade e viabilidade (adaptación ao contexto e aos recursos). • Bibliografía (actualidade e pertinencia das fontes). 5.3. Coñecementos e competencias (ata 1 punto): • Coñecementos didácticos e pedagóxicos (técnicas de ensino, planificación de actividades e adecuación metodolóxica). • Coñecemento da regulación do ensino da lingua galega e do sistema de acreditación do nivel de competencia en lingua galega (Celga) (sistema e referencias normativas). • Capacidade de razoamento e resolución de problemas (argumentación e solución de supostos prácticos). • Habilidades comunicativas e claridade expositiva (coherencia, precisión, uso adecuado do vocabulario e capacidade de estruturar a exposición). • Aptitude, motivación profesional e adecuación ao posto (interese e compromiso). • Dominio do idioma (fluidez, pronunciación, corrección e expresividade).	Máximo 5 puntos

1. Non se valorarán os cursos de menos de 10 horas ou aqueles que non se acrediten as horas.
2. Non se valorarán as actividades de menos de 10 horas ou aquelas que non se acrediten as horas.
3. MCERL: Marco común europeo de referencia para as linguas.
4. ALTE: Asociación de Avaliadores de Linguas Europeas.

